



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Oekusi
Períodu Novembru 2018

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 28

Tipu kazu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	13
Artigu 151 (KP)	Ofensa korporál resíproka	4
Artigu 145 (KP)	Ofensa ba integridade fízika simples	8
Artigu 225 (KP)	Lahalo tuir obrigasaun alimentár	1
Artigu 296 (KP)	Pekulatu ho uzu	1
Artigu 207 (KP)	Kondusaun sein karta	1
Totál	28	28

2. Totál desizaun ne'ebé JSMP monitoriza : 28

Tipu desizaun	Númeru
Pena prizaun – Artigu 66 Kódigu Penál	1
Suspensaun ba pena prizaun nia ezekusaun - Artigu 68 Kódigu Penál	11
Prizaun nia suspensaun ho devér - Artigu 69	1

Rua Beco Lakateu, Aldeia Manu fuik, Suku Colmera, Administrativu Vera Cruz
Dili Timor Leste

PoBox: 275 Telefone: 3323883 | 77295795

www.jsmp.tl info@jsmp.tl

www.jsmp.tl

Facebook: www.facebook.com/timorleste.jsmp

Twitter: @JSMPtl

Pena multa tuir artigu 67 Kódigu Penál	3
Pena admoestrasaun	2
Absolve	2
Omologa dezisténsia keixa	8
Totál	28

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples

Nú. Prosesu Sumariu : 0024/18.OESIC
 Kompozisaun Tribunál : Singulár
 Juis : Dr. João Ribeiro
 Prokuradór : Dr. Mateus Nesi
 Defeza : Dr. Daniel Elu & Dr. Inasio Quebo (AP)
 Tipu pena : Omologa pedidu dezisténsia keixa

Iha 05 Novembru 2018, Tribunál Distritál Oekusi prezide julgamentu tentativa konsiliausaun ba krime ofensa ba integridade fízika simples ne'ebé envolve arguidu Marcelino Bana hasoru nia avo fetu Francisca Quebo, iha Suku Costa Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 02 Maiu 2018, maizumenus tuku 12.00 meudia, arguidu rasta lezada husi uma laran sai to'o liur, tuku dala rua iha lezada nia ulun no rezulta lezada sofre moras iha ulun tanba arguidu deskonfia lezada kaer aimoruk aat.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Tanba kazu ne'e nu'udar krime semi-públiku, nune'e bazeia ba artigu 262 (KPP) kona-ba tentativa ba konsiliausaun, antes tama ba julgamentu produsaun ba prova, juis husu atu halo tentativa konsiliausaun ba arguidu no lezada.

Iha prosesu konsiliausaun ne'e, lezada hakarak dame malu de'it no dada fali nia-keixa maibé ho kondisaun katak arguidu tenke fó indemnizasaun sivil ba lezada ho tais fetu ida, fahi ida, bibi ida no osan US\$200.00. Iha parte seluk arguidu konkorda ho lezada ninia pedidu, arguidu mós deklara katak arrepende ona nia hahalok no promete sei la repete tan hahalok hanesan iha futuru hasoru nia avo fetu.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame hosi parte sira no pedidu dezisténsia hosi lezada, tribunál konklui prosesu ne'e no omologa akordu dame entre parte sira no husu mós ba arguidu tribunál atu fó indemnizasaun sivíl ba lezada ho tais feto ida, fahi ida, bibi ida no osan US\$200.00.

2. Krime ofensa ba integridade fízika simples ho natureza violénsia doméstika

Nú. Prosesu : 0091/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 no suspende ba tinan 1

Iha 06 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FAC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 23 Maiu 2018, maizumenus tuku 16.00 lokraik, arguidu uza ai-turi rohan ida baku dala ida iha lezada nia liman laran parte karuk no baku tan dala ida iha lezada nia kanuruk no rezulta lezada sofre moras. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona ba nia hahalok. Arguidu hanesan agrikultór no laiha rendimentu fixu kada fulan, iha oan nain rua, foin primeiravés mai hatan iha tribunál no diak malu ona ho lezada.

Prokuradór husu ba tribunál atu prezindi lezada nia deklarasaun, tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no tuir loloos arguidu mak proteze lezada, maibé pelu-kontráriu arguidu mak komete fali krime hasoru lezada. Tanba ne'e, husu ba tribunál atu kondena arguidu tuir artigu 145 Kódigu Penál.

Enkuantu defeza husu ba tribunál atu kondena arguidu ho pena ne'ebé kmaan. Defeza mós husu ba tribunál atu konsidera sirkunstánsia atenuantes sira hanesan arguidu konfesa, arrepende ona nia hahalok, foin primeiravés mai hatan iha tribunál no diak malu ona ho lezada.

Desizaun

Depoizde avalia faktu produzidu sira hotu, tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e hotu, tribunál kondena arguidu ho pena prizaun tinan 1 no suspende ba tinan 1.

3. Krime ofensa ba integridade fízika simples ho natureza violénsia doméstika

Nú. Prosesu : 0101/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 9 no suspende ba tinan 1

Iha 06 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 11 Juñu 2018, maizumenus tuku 22.20 kalan, arguidu tuku dala ida iha nia kanuruk, basa dala rua iha lezada nia kanuruk no tuku tan dala ida iha lezada nia liman sikun parte karuk. Agresaun hirak-ne'e kauza lezada sofre moras. Kazu ne'e anexa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu mós deklara katak arrepende ona nia hahalok. Arguidu hanesan agrikultór laiha rendimentu fixu kada fulan. Arguidu iha oan nain 2 no foin primeira-vés mai hatan iha tribunál. Arguidu reforsa tan katak dame malu ona ho lezada no moris hamutuk nu'udar feen-laen.

Prokuradór husu ba Tribunál atu prezinde lezada nia deklarasaun, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór reforsa tan katak atu rezolve problema la'os tenke lori violénsia. Tanba ne'e husu ba tribunál atu kondena arguidu tuir artigu 145 Kódigu Penál.

Iha parte seluk defeza husu ba Tribunál atu aplika pena ne'ebé kmaan ba arguidu, tanba konsidera arguidu konfesa, arrepende ona nia hahalok, iha oan nain 2, foin primeira-vés mai hatan iha tribunál, diak malu ona ho lezada no hela hamutuk fali hanesan feen ho laen.

Desizaun

Depoisde avalia faktu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba prova ne'e no sirkunstánsia sira ne'ebé haleu krime ne'e, tribunál konklui prosesu ne'e no kondena arguidu ho pena prizaun fulan 9 no suspende ba tinan 1.

4. Krime ofensa ba integridade fízika simples

Nú. Prosesu : 0078/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Absolve

Iha 06 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ne'ebé envolve arguidu Joel Bubun hasoru nia viziñu, Filomena Metan, iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 07 Maiu 2018, maizumenus tuku 20.00 kalan, arguidu tuku dala ida iha lezada nia reen-toos no buti dala 1 iha lezada nia kakorok no rezulta lezada sofre moras no bubu iha lezada nia reen-toos no kakorok. Kazu ne'e akontese tanba lezada diskute malu ho arguidu nia feen. Kazu ne'e aneksa mós ho relatóriu médiku husi Ospital Referral Oekusi no fotografia husi Polísia-VPU

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Durante julgamentu, arguidu konfesa parsialmente ba faktus iha akuzasaun, arguidu deklara katak iha akontesimentu ne'e arguidu la tuku iha lezada nia ulun no labuti lezada nia kakorok, maibé arguidu atu hakalma deit lezada ho arguidu nia feen ne'ebé diskute malu hela. Arguidu servisu hanesan seguransa iha kompañia WIKA ho rendimentu kada fulan US\$200.00 no hanesan mós xefe Aldeia Nipani. Liután arguidu deklara katak foin primeira-vés mai hatan iha tribunál no depoisde akontesimentu ne'e hakarak diak malu fali ho lezada no fó mós ho osan US\$200.00 maibé lezada lakohi no hakarak atu arguidu fó indemnizasaun US\$500.00.

Iha parte seluk lezada konfirma faktus hotu iha akuzasaun no deklara katak seidauk diak malu ho arguidu.

Testemuña Imelda Colo nu'udar viziñu depoimenta katak iha akontesimentu ne'e arguidu laiha fatin no liutiha minute 15 ka 20 mak arguidu mosu mai kaer lezada nia liman, maibé testemuña la haree arguidu tuku no buti iha lezada nia kakorok tanba rai nakukun ona.

Testemuña Augusta de Fatima Ena nu'udar lezada nia oan fetu bo'ot depoimenta katak iha akontesimentu ne'e, wainhira testemuña ba iha fatin akontesimentu lezada dehan ba testemuña

katak arguidu tuku iha lezada nia reen-toos no buti lezada nia kakorok. Testemuña haktuir tan katak depoisde akontesimentu ne'e testemuña rasik mak lori lezada ba iha polisia no ba mós ospital hodi halo tratamentu no iha kalan ne'e lezada baixa iha ospital to'o dader mak foin alta husi ospital no fila ba uma.

Alegasaun final

Prokurador haktuir katak arguidu tenta atu bosok tribunál, maibe lezada konfirma faktus hotu iha akuzasaun, nune'e prokurador konsidera arguidu provadu komete krime hasoru lezada. Tanba ne'e husu ba tribunál atu kondena arguidu tuir pena ne'ebé hakerek ona iha artigu 145 KP.

Enkuantu defeza haktuir katak arguidu deklarara ho onestu no defeza fiar liu ba arguidu nia deklarasaun, tanba bazeia ba testemuña Augusta de Fatima nu'udar lezada nia oan ne'ebé deklarara katak iha kalan ne'e lezada baixa kedas iha ospital, maibe iha relatóriu médiku dehan katak lezada la baixa no iha dader mak lezada ba halo tratamentu iha ospital, maibe fila kedas. Arguidu foin primeira-vés mai iha tribunál no iha oan nain 6. Arguidu hakarak diak malu fali ho lezada no fó mós ho osan US\$200.00 maibe lezada mak lakohi no lezada hakarak arguidu tenke fó osan indemnizasaun US\$500.00. Arguidu ho lezada hanesan viziñu no hanesan mós kompadre ho komadre. Tanba ne'e husu ba tribunál atu absolve arguidu husi krime ne'e maibe karik tribunál iha hanoin seluk, parte defeza husu justisa.

Desizaun

Depoisde avalia faktus hotu, tribunál konsidera katak arguidu la provadu komete krime hasoru lezada tanba tuir relatóriu médiku husi ospital la hatudu katak lezada nia reen-toos bubu ka mean inklui lezada nia kakorok. Bazeia ba konsiderasaun hirak ne'e, tribunál konklui prosesu ne'e no absolve arguidu husi prosesu ne'e.

5. Krime ofensa ba integridade física simples ho natureza violência doméstica

Nú. Prosesu	: 0082/18.OESIC
Kompozisaun Tribunál	: Singulár
Juis	: Dr. João Ribeiro
Prokurador	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 1 fulan 6 no suspende ba tinan 2

Iha 07 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu GF hasoru nia feen, iha Distritu Oekusi.

Akuzasaun Prokurador

Prokurador akuza katak iha 10 Maiu 2018, maizumenus tuku 02.00 madrugada, arguidu ho lezada diskute malu, wainhira arguidu fila hosi kolega nia uma ho kondisaun lanu, arguidu tuku dala ida iha lezada nia reen-toos no rezulta lezada sofre moras iha reen-toos. Kazu ne'e aneksa mós ho relatóriu médiku husi PRADET no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu uza nia direitu nonok. Enkuantu lezada konfirma faktus hotu iha akuzasaun no deklarata katak depoisde akontesimentu ne'e diak malu kedas ho arguidu.

Testemuña FS no FF nu'udar arguidu nia inan-aman mós lakohi fó sira ninia depoimentu no uza direitu nonok.

Alegasaun final

Prokuradór konsidera arguidu provadu komete krime hasoru lezada, mezmu arguidu no testemuña sira uza direitu nonok, maibé lezada konfirma faktus hotu iha akuzasaun. Tanba ne'e, husu ba tribunál atu kondena arguidu tuir artigu 145 KP.

Iha parte seluk, defeza husu ba tribunál atu aplika pena ne'ebé kmaan ba arguidu, tanba lezada konfirma katak depoisde akontesimentu ne'e diak malu kedas ho arguidu.

Desizaun

Depoisde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu hirak ne'e, tribunál konklui prosesu ne'e no kondena ho pena prizaun tinan 1 fulan 6 no suspende ba tinan 2 no selu kustu judisiál US\$30.00.

6. Krime ofensa ba integridade fízika simples

Nú. Prosesu	: 0031/18.OEPMK
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Omologa pedidu dezisténsia keixa

Iha 07 Novembru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Angelo da Cruz Caba hasoru nia prima, iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 25 Juñu 2018, maizumenus tuku 09.00 dader, arguidu basa dala ida iha lezada nia hasan parte loos no basa dala dala iha lezada nia hasan parte karuk no rezulta lezada sofre moras. Kazu ne'e akontese wainhira arguidu fila ba uma hare lezada ho arguidu nia feen diskute malu hela. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dame malu no dada fali nia-keixa maibé ho kondisaun katak arguidu tenke fó indemnizasaun sivil hodi taka lezada nia kanek ho tais mane 1. Arguidu deklara katak konkorda ho lezada nia pedidu ne'e, arguidu mós deklara katak arrepende ona nia hahalok no promete sei la repete tan hahalok hanesan iha futuru hasoru nia prima.

Alegasaun final

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, tribunál konklui prosesu ne'e no omologa akordu dame entre parte sira. Tribunál mós apela ba arguidu atu kumpri ninia devér hodi fó indemnizasaun sivil ba lezada tais mane 1 tuir kultura Timor nian.

7. Krime ofensa ba integridade física simples ho natureza violência doméstica

Nú. Prosesu : 0089/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 9 no suspende ba tinan 1

Iha 08 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MN hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 23 Maiu 2018, maizumenus iha 14.30 lokraik, arguidu ho lezada dsikute malu bainhira lezada husu osan 0.25 sentavus atu sosa susuben Indomilk ba sira nia oan, nune'e, arguidu basa dala ida iha lezada niaibun no rezulta lezada sofre kanek no ran iha lezada niaibun. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Durante julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok. Arguidu servisu hanesan to'os-na'in, laiha rendimentu fixu kada fulan no iha oan nain rua. Arguidu promete ba tribunál katak sei la-komete tan krime hasoru lezada ka ema

seluk iha futuru. Arguidu deklarata katak depoisde akontesimentu ne'e diak malu kedas ho lezada no agora dadaun moris hamutuk iha uma ida hanesan feen-laen.

Prokurador husu ba tribunál atu prezinde lezada nia deklarasaun, tanba arguidu konfesa faktus hotu iha akuzasaun.

Alegasaun final

Prokurador haktuir katak arguidu provadu komete krime hasoru lezada. Tuir dadus Ministériu Públiku Rejiaun Oekusi nian hatudu katak kazu violénsia doméstika barak liu akontese iha Rejiaun Oekusi kompara ho distritu/munisípiu sira seluk. Tanba ne'e husu ba tribunál atu aplika pena tuir artigu 145 KP.

Enkuantu defeza haktuir katak arguidu deklarata faktus hotu ne'ebé akuza ba arguidu, arrepende ona nia hahalok no promete sei la komete tan krime hasoru lezada iha futuru no arguidu iha oan nain rua. Defeza haktuir tan katak arguidu laiha rendimentu fixu kada fulan no foin primeira-vés mai hatan iha tribunál. Tanba ne'e husu ba tribunál aplika pena ne'ebé adekua ba arguidu.

Desizaun

Tribunál konklui katak arguidu provadu komete krime hasoru lezada. Bazeia ba faktu provadu hirak ne'e no sirkunstánsia atenuante sira hotu hanesan arguidu konfesa, arrepende ona nia hahalok foin primeiravés mai hatan iha tribunál no diak malu ona ho lezada, tribunál kondena arguidu ho pena prizaun fulan 9 suspende ba tinan 1.

8. Krime ofensa korporál resíproka

Nú. Prosesu	: 0062/18.OESIC
Kompozisaun Tribunál	: Singulár
Juis	: Dr. João Ribeiro
Prokurador	: Dr. Mateus Nesi
Defeza	: Dr. Calisto Tout
Tipu pena	: Omologa pedidu dezistencia keixa

Iha 08 Novembru 2018, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve arguidu VT ho nia feen, iha Sub-distritu Pante-makassar, Distritu Oekusi.

Akuzasaun Prokurador

Prokurador akuza katak iha 17 Abril 2018, maizumenus tuku 15.00 lokraik, arguidu buti dala ida iha lezada nia ibun no tuku dala ida iha lezada nia ulun parte loos no rezulta lezada sofre moras. Nune'e lezada halo reasaun hasoru arguidu hodi lori ai-sanak ida baku dala ida iha arguidu nia kotuk laran no rezulta arguidu sofre moras. Kazu ne'e akontese sein motivu ne'ebé klaru husi arguidu no lezada. Kazu ne'e aneksa mós ho relatóriu médiku husi PRADET no fotografia husi Polisia-VPU.

Prokurador akuza arguidu/a kontra artigu 151 Kódigu Penál kona-ba krime ofensa korporál resíproka ne'ebé ho moldura penál too tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, arguidu ho lezada hakarak dame malu de'it no dada fali sira nia-keixa no deklarata katak arrepende ona sira nia hahalok no promete sei la repete tan hahalok hanesan iha futuru.

Alegasaun final

Prokurador no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezistencia hosi parte sira, Tribunál konklui prosesu ne'e no omologa akordu dame entre parte sira.

9. Krime ofensa ba integridade física simples ho natureza violência doméstica

Nú. Prosesu : 0073/18.OESIC
Kompozisaun Tribunál : Singulár
Juis : Dr. João Ribeiro
Prokurador : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 fulan 6 suspende ba tinan 2

Iha 08 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JNA hasoru nia feen, iha Distritu Oekusi.

Akuzasaun Prokurador

Prokurador akuza katak iha 04 Maiu 2018, maizumenus tuku 07.00 dader, arguidu ho lezada diskute malu, wainhira arguidu toba hela lezada fanu arguidu atu hader, nune'e arguidu basa dala ida iha lezada nia ibun no basa dala ida iha lezada nia inus. Arguidu kontinua tuku tan dala ida iha lezada nia kabaas parte karuk no tuku dala ida iha lezada nia kotuk laran. Kazu ne'e aneksa mós ho relatóriu médiku husi PRADET no fotografia husi Polisia-VPU.

Prokurador akuza arguidu kontra artigu 145 Kódigu Penál kona-ba krime ofensa ba integridade física simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arrepende ona nia hahalok, no foin primeiravés mai hatan iha tribunál. Arguidu servisu nu'udar to'ós-na'in no laiha rendimentu fixu kada fulan, iha oan nain lima, diak malu ona ho lezada no promete sei la komete tan krime hanesan iha futuru.

Prokurador husu ba tribunál atu prezinde lezada nia deklarasaun, tanba arguidu konfesa integralmente ba faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba faktu sira ne'ebé prodús liuhosi konfisaun arguidu nian, nune'e atu evita krime hanesan akotese tan iha futuru, husu ba Tribunál atu kondena arguidu tuir artigu 145 KP.

Enkunatu defeza husu ba tribunál atu kondena arguidu ho pena ne'ebé kmaan ba arguidu ho konsiderasaun sira katak, arguidu konfesa, arrepende ona nia hahalok no diak malu ona ho lezada.

Desizaun

Depoide avalia faktu sira hotu, tribunál prova katak arguidu komete duni krime tuir faktus sira iha akuzasaun prokuradór nian. Bazeia ba faktu provadu sira ne'e, tribunál kondena arguidu ho pena prizaun tinan 1 fulan 6 no suspende ba tinan 2.

10. Krime ofensa ba integridade fízika simples ho natureza violénsia doméstika

Nú. Prosesu : 0080/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena multa

Iha 08 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 08 Maiu 2018, maizumenus tuku 19.00 kalan, arguidu tuku dala haat iha lezada nia ulun parte karuk, buti dala rua iha lezada nia kakorok no tuku dala rua tan iha lezada nia reen-toos. Agresaun ne'e rezulta lezada sofre moras iha ulun, kakorok no reen-toos. Kazu ne'e aneksa mós ho relatóriu médiku husi Ospital Referal Oekusi no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa integralmente ba faktus sira iha akuzasaun no deklara katak arrepende ona nia hahalok. Arguidu servisu nu'udar funsionáriu iha NGO TUBA RAI METIN ho rendimentu kada fulan US\$178.00, iha oan nain rua no arguidu foin primeira-vés mai hatan iha tribunál. Arguidu reforsa tan katak dame malu ona ho lezada no moris hamutuk fali ona hanesan feen-laen.

Prokuradór husu ba Tribunál atu prezinde lezada nia deklarasaun, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór rejista katak kazu violénsia doméstika akontese barak liu iha Rejiaun Oekusi kompara ho distritu/munisípiu sira seluk. Tanba ne'e husu ba tribunál atu kondena arguidu tuir artigu 145 KP.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu konfesa, arrepende ona nia hahalok, foin primeiravés mai hatan iha tribunál, diak malu ona ho lezada no iha oan nain rua.

Desizaun

Tribunál konklui katak arguidu provadu komete duni krime tuir faktu sira iha akuzasaun prokuradór nian. Bazeia ba faktu provadu sira ne'e, tribunál kondena arguidu ho pena multa US\$120.00 ne'ebé sei selu US\$1.00 kada lora durante lora 120 no selu kustu judisiál US\$20.00. Tribunál mós fixa pena alternativa durante lora 80 prizaun, wainhira arguidu la kumpri pena multa refere.

11. Krime ofensa ba integridade fízika simples ho natureza violénsia doméstika

Nú. Prosesu : 0050/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nessi
Defeza : Dr. Marcelino Marques Coro
Tipu pena : Pena multa

Iha 09 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu HJMA hasoru nia alin mane rasik, iha Distritu Oekusi.

Akuzasaun Prokuradór

Prokuradór akuza katak iha 02 Abril 2018, maizumenus tuku 16.00 lokraik, arguidu tuku dala haat iha lezadu nia liman parte karuk no tebe dala rua iha lezadu nia kanotak. Agresaun ne'e rezulta lezadu sofre bubu, mean no moras iha liman no kanotak. Kazu ne'e akontese tanba arguidu rona informasaun husi sira nia inan katak lezadu tenta atu baku sira nia inan. Kazu ne'e aneksa mós ho relatóriu médiku husi PRADET no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun. Arguidu deklarata katak arrepende ona nia hahalok, arguidu servisu nu'udar funsionáriu públiku ho rendimentu kada fulan US\$620.00 no iha oan nain ida. Arguidu haktuir tan katak foin primeira-vés mai hatan iha tribunál, diak malu ona ho lezadu.

Prokuradór husu ba Tribunál atu prezinde lezadu nia deklarasaun, tanba iha produsaun ba prova arguidu konfesa faktus hotu iha akuzasaun.

Alegasaun final

Prokuradór konsidera arguidu komete krime duni krime hasoru lezadu bazeia ba konfisaun arguidu nian. Prokuradór hatutan liután katak, tuir lolos arguidu mak proteze lezadu no bele uza maneira ida-ne'ebé diak liu no lahó violénsia hasoru nia alin, maibé pelu-kontráriu arguidu mak komete fali krime hasoru lezadu. Tanba ne'e atu evita krime hanesan akontese tan iha futuru, husu ba tribunál atu kondena arguidu tuir artigu 145 KP.

Enkunatu defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa, arrepende ona nia hahalok no diak malu ona ho lezadu.

Desizaun

Tribunál prova katak arguidu komete duni krime tuir faktus sira iha akuzasaun prokuradór nian. Bazeia ba faktu provadu sira ne'e, tribunál kondena arguidu ho pena multa US\$120.00 ne'ebé sei selu US\$1.00 kada loron durante loron 120 no selu kustu judisiál US\$20.00. Tribunál mós fixa pena alternativa durante loron 80 prizaun wainhira arguidu la kumpri pena multa refere.

12. Krime kondusaun sein karta

Nú. Prosesu	: 0003/18.OESTR
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena multa

Iha 09 Novembru 2018, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Julio Minguel Varela hasoru Estadu RDTL, iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 22 Janeiru 2018, maizumenus tuku 09.00 dader, arguidu lori kareta ho marka avansa no seidak iha xapa matrikula halai iha dalan públiku Oekusi Vila. Wainhira polisia pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova sira

Iha julgamentu, arguidu konfesa faktus hotu iha akuzasaun, deklarata katak arrepende ona nia hahalok, no foin primeira-vés komete krime. Liután arguidu deklarata katak hahalok hanesan ne'e ladiak no kontra lei Timor.

Prokuradór husu ba Tribunál atu prezinde testemuña hosi Polisia Tranzitu Oekusi nia depoimentu, tanba arguidu konfesa faktus hotu iha akuzasaun.

Alegasaun finál

Prokurador konsidera arguidu provadu komete krime kondusaun sein karta bazeia ba konfisaun arguidu nian. Prokuradór haktuir tan katak krime kondusaun sein karta kada fulan sempre akontese, tanba ne'e husu ba tribunál atu kondena arguidu tuir pena ne'ebé hakerek ona iha artigu 207 KP.

Enkuantu defeza haktuir katak arguidu konfesa, arrepende ona nia hahalok, foin primeiravés mai hatan iha iha oan nain rua. Liután defeza haktuir katak arguidu laiha rendimentu fixu kada fulan. Tanba ne'e husu ba tribunál atu aplika ne'ebé kmaan ba arguidu.

Desizaun

Depoide avalia faktu provadu sira ne'ebé produs durante julgamentu, tribunál konsidera arguidu provadu komete krime kondusaun sein karta. Tribunál konklui prosesu ne'e no kondena arguidu ho pena multa US\$60.00 ne'ebé sei selu 0.50 sentavus kada loron durante loron 120. Tribunál mós fixa pena alternative durante loron 80 prizaun wainhira arguidu la kumpri pena multa refere.

13. Krime ofensa korporál resíproka

Nú. Prosesu	: 0063/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Omologa pedidu dezistencia keixa

Iha 09 Novembru 2018, Tribunál Distritál Oekusi prezide julgamentu tentativa konsiliaun ba krime ofensa korporál resíproka entre NF ho MN nu'udar feen-laen, iha Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 21 Abril 2018, maizumenus iha tuku 20.00 kalan, NF (feen) tuku dala ida iha MN (laen) nia kotuk laran no tebe dala ida iha MN nia kelen parte karuk. Hafoin MN buti dala ida iha nia-feen ninia ibun, buti dala ida iha kakorok no riba arguida ba rai. Aktu ne'e akontese sein motivu ne'ebé klaru. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu/a kontra artigu 151 Kódigu Penál kona-ba krime ofensa korporál resíproka ne'ebé ho moldura penál too tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba NF no MN.

Iha prosesu konsiliaun ne'e, NF o MN hakarak dame malu de'it no dada fali sira nia-kazu sein kondisaun ruma no deklara katak arrepende ona sira nia hahalok no promete sei la repete tan hahalok hanesan iha futuru.

Alegasaun finál

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi parte sira, Tribunál konklui prosesu ne'e no omologa akordu dame entre parte sira.

14. Krime ofensa ba integridade fízika simples ho natureza violénsia doméstika

Nú. Prosesu : 0103/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 9 no suspende ba tinan 1

Iha 13 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CT hasoru nia feen, iha Suku Costa, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 13 Jullu 2018, maizumenus tuku 16.00 lokraik, arguidu basa dala ida iha lezada nia oin iha parte besik matan fukun loos no rezulta lezada monu tun ba rai no sofre moras. Violénsia ne'e akontese bainhira arguidu sei hemu hela tua sabu iha to'os no arguidu hakarak lezada tuur-hein lai arguidu depois sira fila hamutuk ba uma. Kazu ne'e anexa hamutuk ho relatóriu médiku husi PRADET no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu deklarata katak arrepende ona nia hahalok. Arguidu nu'udar to'os-na'in no laiha rendimentu fixu kada fulan, iha oan nain haat, no arguidu foin primeiravés mai hatan iha tribunál. Arguidu reforsa tan katak diak malu ona ho lezada no moris hamutuk hanesan feen ho laen.

Prokuradór husu ba tribunál atu prezinde lezada no testemuña nia deklarasaun, tanba iha produsaun ba prova arguidu konfesa ba faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no tuir loloos arguidu mak proteze lezada, maibé pela kontrariu arguidu mak komete fali krime hasoru lezada ne'ebé laiha forsa atu halo reasaun hasoru arguidu. Tanba ne'e husu ba tribunál atu kondena arguidu tuir artigu 145 Kódigu Penál.

Iha parte seluk, defeza husu ba tribunál atu aplika pena ne'ebé kmaan ba arguidu ho konsiderasaun sira katak, arguidu konfesa, arrepende ona nia hahalok, iha oan nain haat, foin primeiravés mai hatan iha tribunál, diak malu ona ho lezada no hela hamutuk iha uma ida hanesan feen ho laen.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e, tribunál kondena arguidu ho pena prizaun fulan 9 no suspende ba tinan 1.

15. Krime ofensa ba integridade fízika simples ho natureza violénsia doméstika

Nú. Prosesu : 0026/18.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nessi
Defeza : Dr. Calisto Tout
Tipu pena : Pena prizaun tinan 1 fulan 6 suspende ba tinan 2

Iha 13 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 11 Juñu 2018, maizumenuz tuku 12.00 meudia, arguidu tebe dala ida iha lezada nia kelen parte loos, basa dala ida iha lezada nia hasan parte karuk, buti dala ida iha lezada. Kazu ne'e akontese bainhira lezada haruka arguidu haree sira nia oan atu lezada ba ospital, maibe arguidu lakohi no sira haksasuk malu. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun. Arguidu deklarara katak arrepende ona nia hahalok, servisu hanesan to'ós-na'in, laiha rendimentu fixu kada fulan no iha oan nain rua. Arguidu foin primeiravés halo krime hasoru nia feen no mai iha tribunál no agora sira dame malu ona no moris hamutuk hanesan feen-laen.

Prokuradór husu ba Tribunál atu prezinde lezada no testamuña sira nia deklarasaun, tanba iha produsaun ba prova arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór hatutan liután katak, tuir lolos arguidu mak proteze lezada no arguidu mós iha

obrigasaun atu haree sira nia oan kuandu lezada persija atu ba ospital hodi konsulta ba nia saude. Tanba ne'e husu ba tribunál atu aplika pena tuir artigu 145 KP.

Enkuantu defeza husu ba tribunál atu kondena arguidu ho pena ne'ebé adekuadu, bazeia ba konsiderasaun sira katak, arguidu konfesa, arrepende ona nia hahalok no diak malu ona ho lezada.

Desizaun

Depoide avalia faktu sira hotu, tribunál prova katak arguidu komete duni krime tuir faktus sira iha akuzasaun prokurador nian. Bazeia ba faktu provadu sira ne'e, tribunál kondena arguidu ho pena prizaun tinan 1 fulan 6 no suspende ba tinan 2.

16. Krime ofensa ba integridade física simples

Nú. Prosesu : 0002/18.OEPMK
Kompozisaun Tribunál : Singulár
Juis : Dr. João Ribeiro
Prokurador : Dr. Mateus Nesi
Defeza : Dr. Calisto Tout
Tipu pena : Omologa pedidu dezisténsia keixa

Iha 13 Novembru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade física simples ne'ebé envolve arguidu Agostinho Antonio Colo hasoru nia bin lezada Veronica Colo, iha Suku Naimeco, Sub-distritu Pante-makassar, Distritu Oekusi.

Akuzasaun Prokurador

Prokurador akuza katak iha 03 Janeiro 2018, maizumenus iha tuku 20.00 kalan, arguidu uza aifunan sanak ida baku dala rua iha lezda nia kabaas-loos no baku dala rua iha lezada nia kabaas parte karuk no rezulta lezada sofre moras. Arguidu kontinua tuku dala ida iha lezada nia hasan parte karuk no basa dala tolu iha lezada nia hasan parte loos no rezulta lezada sofre moras. Kazu ne'e aneksa mós ho relatóriu médiku husi Sentru Saúde Baqui no fotografia husi Polísia-VPU. Agresaun hirak-ne'e akontese tanba lezada hemu tua to'o lanu.

Prokurador akuza arguidu kontra artigu 145 Kódigu Penál kona-ba krime ofensa ba integridade física simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dame malu no dada fali nia-keixa maibé ho kondisaun katak arguidu tenke fó indemnizasaun sivil ho montante osan US\$70.00 ba lezada. Arguidu konkorda no sei fó indemnizasaun sivil ba lezada tuir pedidu refere. Arguidu mós deklarara katak arrepende ona nia hahalok no promete katak sei la repete tan hahalok hanesan iha futuro, nune'e lezada husu ba tribunál atu dezisté ninia-keixa hasoru arguidu.

Alegasaun final

Prokurador no defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, tribunál konklui prosesu ne'e no omologa akordu dame entre parte sira. Tribunál mós husu ba arguidu atu kumpri ninia devér hodi fó indemnizasaun sivíl ho montante US\$70.00 ba lezada iha 30 Novembru 2018.

17. Krime ofensa korporál resíproka

Nú. Prosesu : 0030/18.OEPMK
Kompozisaun Tribunál : Singulár
Juis : Dr. João Ribeiro
Prokurador : Dr. Mateus Nesi
Defeza : Dr. Calisto Tout
Tipu pena : Omologa pedidu dezistensia keixa

Iha 13 Novembru 2018, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve arguida Aneza Taec Elu hasoru nia prima Apolonia Elu, iha Suku Nipani, Sub-distritu Pante-makassar, Distritu Oekusi.

Akuzasaun Prokurador

Prokurador akuza katak iha 22 Juñu 2018, maizumenus tuku 07.00 dader, arguida rakut dala ida iha lezada nia fuuk no rakut dala ida iha lezada nia kabaas parte loos. Arguida kontinua tuku dala ida iha lezada niaibun no tebe dala ida iha lezada nia kabun kidun parte loos no rezulta lezada monu ba rai no sofre moras. Hafoin lezada hamrik fali hodi rakut arguida nia fuuk no rakut arguida nia hasan parte karuk. Aktu ne'e akontese arguida deskonfia lezada konta arguida nia problema privadu ba sira nia viziñu. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokurador akuza arguida sira kontra artigu 151 Kódigu Penál kona-ba krime ofensa korporál resíproka ne'ebé ho moldura penál too tinan 2 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguida no lezada.

Iha prosesu konsiliaun ne'e, lezada hakarak dame malu de'it no dada fali nia-keixa sein kondisaun ruma. Iha parte seluk arguida konkorda no deklarata katak arrepende ona ba sira nia hahalok no promete katak sei la repete tan hahalok hanesan iha futuru.

Alegasaun final

Prokurador no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezada, Tribunál konklui prosesu ne'e no omologa akordu dame entre parte sira.

18. Krime la halotuir obrigasaun alimentár

Nú. Prosesu : 0010/18.PDOEC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nessi
Defeza : Dr. Marcelino Marques Coro
Tipu pena : Prizaun tinan 1 fulan 6 suspende ba tinan 2 no indemnizasaun sivil

Iha 14 Novembru 2018, Tribunál Distritál Oekusi prezide julgamentu leitura sentensa ba krime la halo tuir obrigasaun alimentár ne'ebé envolve arguidu Antonio Sufa hasoru nia oan mane lezadu Eufrazio Antonio Ribeiro Sufa (Fulan 6), iha Suku Lifau, Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 04 Maiu 2018, arguidu husik tiha nia feen ho nia oan mane no la halotuir obrigasaun. Arguidu nia hahalok ne'e kauza lezada ho sira nia oan mane sofre no moris iha susar nia laran.

Prokuradór akuza arguidu kontra artigu 225 Kódigu Penál kona-ba krime lahalotuir obrigasaun alimentár ho moldura penál to'o tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu ne'ebé reprezenta husi nia inan Sherli Maria Octaviana Sequeira Sila, maibé lakonsege hetan akordu.

Iha julgamentu, arguidu konfesa parsialmente ba faktus iha akuzasaun no hakarak atu halo tuir nia obrigasaun alimentar ba labarik ne'e. Maske nune'e, arguidu hakarak halo teste DNA atu hatene loloos labarik ne'e nia oan ka lae, mesmu iha sertidaun RDTL nian hakerek arguidu nia apelidu. Arguidu haktuir tan katak antes ne'e iha fulan Juñu ate fulan Agostu 2017, arguidu ho Sherli moris hamutuk hanesan feen-laen no hela iha uma ida. Arguidu servisu iha Diresaun Terras no Propriedade Rejiaun Administrativu Espesial Oekusi Ambeno (RAEOA) ho rendimentu kada fulan US\$343.00. Arguidu mós reforsa tan katak antes ne'e iha fulan Setembru 2017, lia na'in no xefe suku rezolve ona problema ne'e no arguidu fó ona indemnizasaun sivil ba lezadu nia familia ho morten naruk rua sura ba osan US\$4,000.00), karau aman ida no osan US\$500.00 no iha ona akordu dame entre parte sira.

Iha parte seluk lezada konfirma faktu hotu iha akuzasaun, lezada mós deklarata katak agora dadaun lezada hela hamutuk ho lezada nia inan aman, tanba arguidu la tau matan ba sira, no antes ne'e sira rezolve ona problema ne'e iha lia nain no xefe suku nia oin no arguidu fó ona

indemnizasaun sivil ba lezadu nia familia ho morten naruk rua sura ba osan US\$4,000.00) karau aman ida no osan US\$500,00 no iha ona akordu dame entre sira.

Alegasaun final

Prokuradór konsidera arguidu provadu komete krime hasoru lezadu ho nia inan mesmu iha julgamentu arguidu konfesa parsialmente no rezeita lakohi halo tuir nia obrigasaun alimentar ba nia oan ho nia feen. Prokuradór haktuir tan katak arguidu rezeita lakoi responsavel ba nia oan ho nia feen tanba arguidu konsidera indemnizasaun sivil ne'ebé nia fó ona ba lezadu nia familia sira hanesan responsabilidade ba nia oan. Prokurador mós kondisera katak arguidu la arrepende nia hahalok mesmu husik lezada ho nia oan iha situasaun terus nia laran. Tanba ne'e husu ba tribunál atu kondena arguidu tuir artigu 225 Kódigu Penál.

Iha parte seluk defeza husu ba tribunál atu aplika pena ne'ebé kmaan ba arguidu, tanba arguidu konfesa faktus parsialmente no foin primeira-vés mai hatan iha tribunál. Defeza reforsa tan katak lezada nia familia hakarak arguidu tenke fó indemnizasaun sivil ho totál osan hamutuk US\$4,700.00 no tuir loloos osan hirak ne'e lebele fó tomak ba lezada nia familia sira maibé balun tenke fó ka entrega ba lezadu nia inan. Arguidu la arrepende tanba arguidu kumpri ona nia responsabilidade hodi fó ona indemnizasaun sivil ba lezada hafoin sira moris keta-ketak.

Desizaun

Depoisse avalia faktu hotu, tribunál prova katak arguidu komete duni krime tuir faktu sira iha akuzasaun tanba faktus hirak ne'e konfirmadu ho deklarasaun husi arguidu no lezada. Bazeia ba prova no konsiderasaun sira ne'e hotu, tribunál kondena arguidu ho pena prizaun tinan 1 fulan 6 no suspende ba tinan 2 inklui selu kustu judisiál US\$20.00. Tribunál mós kondena arguidu atu selu indemnizasaun sivil ba lezadu ho kada fulan US\$70.00 to'o lezadu kompleta tinan 17.

19. Krime ofensa ba integridade física simples ho natureza violéncia doméstika

Nú. Prosesu	: 0098/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Marcelino Marques Coro
Tipu pena	: Pena prizaun tinan 1 suspende ba tinan 1 fulan 6

Iha 15 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu JdSO hasoru nia feen, Distritu Oekusi.

Akuzasaun Prokuradór

Prokuradór akuza katak iha 05 Juñu 2018, maizumenus iha tuku 11.00 dader, arguidu tuku dala haat iha lezada nia ulun, tuku dala ida iha lezada niaibun, tebe dala haat iha lezada nia kotuk laran. Agresaun hirak-ne'e rezulta lezada sofre moras. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to' o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun. Arguidu deklarata katak arrepende ona nia hahalok, arguidu laiha rendimentu fixu kada fulan no arguidu iha oan nain ida. Arguidu foin primeiravés halo krime hasoru nia feen no mai iha tribunál no agora sira dame malu ona no moris hamutuk hanesan feen-laen.

Prokuradór husu ba Tribunál atu prezinde lezada nia deklarasaun, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór argumenta katak tuir-loos arguidu mak proteze lezada no bele uza maneira ida ne'ebé violentu atu rezolve problema. Infelismente arguidu halo fali krime hasoru lezada ne'ebé mak laiha forsa atu halo reasaun hasoru arguidu. Tanba ne'e, husu ba Tribunál atu kondena arguidu tuir artigu 145 KP.

Defeza husu ba tribunál atu kondena arguidu ho pena ne'ebé kmaan ba arguidu, tanba defeza hanoin katak iha produsaun ba prova arguidu iha kolaborasaun diak, konfesa, arrepende ona nia hahalok.

Desizaun

Depoide avalia faktu sira hotu, tribunál prova katak arguidu komete duni krime tuir faktus sira iha akuzasaun prokuradór nian. Bazeia ba faktu provadu sira ne'e, tribunál kondena arguidu ho pena prizaun tinan 1 no suspende ba tinan 1 fulan 6.

20. Krime ofensa ba integridade fízika simples

Nú. Prosesu	: 0106/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun fulan 6 no suspende ba tinan 1

Iha 15 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ne'ebé envolve arguidu Domingos Neno hasoru nia viziñu Francisco Taeque, iha Suku Bobocase, Sub-distritu Pante-makassar Distritu Oekusi.

Akuzasaun Prokuradór

Prokuradór akuza katak iha 17 Juñu 2018, maizumenus iha tuku 18.30 lokraik, arguidu tuku dala ida iha lezadu nia oin parte loos, dudu no riba tun lezadu husi kadeira leten no tebe dala ida iha lezada nia kotuk laran. Agresaun ne'e rezulta lezadu sofre moras no kazu ne'e akontese sein motivu ne'ebé klaru.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha julgamentu, arguidu konfesa integralmente ba faktus hotu iha akuzasaun no arguidu mós deklara katak arrepende ona ba nia hahalok. Arguidu servisu nu'udar to'ós-na'in, laiha rendimentu fixu kada fulan no a iha oan nain tolu, no foin primeira-vés mai hatan iha tribunál. Arguidu reforsa tan katak tenta atu dame malu maibé lezadu mak lakohi.

Prokuradór husu ba Tribunál atu prezinde lezadu nia deklarasaun, tanba iha produsaun ba prova arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezadu bazeia ba konfisaun arguidu nian, tanba ne'e husu ba tribunál atu kondena arguidu tuir artigu 145 KP.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu konfesa, arrepende ona nia hahalok, foin primeiravés mai hatan iha tribunál. Arguidu mós manifesta nia vontade no inisiativa diak hakarak diak malu fali ho lezadu, maibé lezadu mak lakohi.

Desizaun

Depoizde avalia faktus hotu, tribunál prova katak arguidu komete duni krime tuir faktus sira iha akuzasaun. Bazeia ba faktus prova sira ne'e, tribunál kondena arguidu ho pena prizaun fulan 6 no suspende ba tinan 1.

21. Krime ofensa ba integridade fízika simples

Nú. Prosesu : 0003/18.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Omologa pedidu dezistensia keixa

Iha 15 Novembru 2018, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguida Sabina Asu hasoru nia viziñu Fernando Abi, iha Suku Naimeco Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 07 Janeiru 2018, maizumenus tuku 12.00 meudia, arguida tata dala ida dala ida iha lezadu nia kabaas parte loos no uza ai-kafe nia sanak ida baku dala ida iha lezadu nia ulun no rezulta lezadu sofre moras. Kazu ne'e akontese wainhira arguida ho lezadu diskute malu kona-ba baliza rai nian. Kazu ne'e aneksa mós ho relatóriu médiku husi Ospital Referral Oekusi no fotografia husi Polísia-VPU.

Prokuradór akuza arguida kontra artigu 145 Kódigu Penál kona-ba krime ofensa ba integridade fízika simples ne'ebé ho moldura penál too tinan 3 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguida no lezadu.

Iha prosesu konsiliaun ne'e, lezadu hakarak dame malu de'it no dada fali nia-keixa maibe ho kondisaun katak arguida tenke fó indemiizasaun sivil ba lezadu ho valór osan US\$75.00. Iha parte seluk arguida konkorda no deklara katak arrepende ona ho nia hahalok no promete katak sei la repete tan hahalok hanesan iha futuru.

Alegasaun final

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezadu, Tribunál konklui prosesu ne'e no omologa akordu dame entre parte sira no kondena arguida atu fó indemnizasaun sivil ba lezadu ho osan US\$75.00.

22. Krime pekulatu ba uzu

Nú. Prosesu	: 0068/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun fulan 3 suspende ba tinan 1

Iha 16 Novembru 2018, Tribunál Distritál Oekusi prezide julgamentu leitura sentensa ba krime pekulatu ba uzu ne'ebé envolve arguidu Beatos Teme hasoru Estadu RDTL, iha Suku Naimeco, Sub-distritouPante-makassar, Distritu Oekusi.

Akuzasaun Prokuradór

Prokuradór akuza katak iha 25 Abril 2018, maizumenus tuku 14.30 lokraik, arguidu uza motor estadu nian ho marka Honda Mega-Pro no xapa madrikula 6127.G hodi partisipa iha kampaña eleisaun antisipada.

Prokuradór akuza arguidu kontra artigu 296 Kódigu Penál kona-ba krime pekulatu ba uzu ho moldura penál to'o tinan 2 ka multa.

Produsaun ba prova sira

Iha julgamentu, arguidu konfesa faktus hotu iha akuzasaun, arguidu mós deklara katak arrepende ona nia hahalok. Arguidu hatene katak lori motorizada estadu nian hala'o atividade partidu nian ladiak no kontra lei. Arguidu servisu hanesan funsionáriu públiku iha sekretáriu asuntu agrikultór ho rendimentu kada fulan US\$284.00. Arguidu iha oan nain tolu no arguidu foin primeira-vés mai hatan iha tribunál. Arguidu deklara ba tribunál katak sei larepete tan hahalok ne'e iha futuru.

Tribunál prezindi testemuña nia depoimentu, tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime pekulatu ba uzu hasoru estadu RDTL, tanba arguidu hanesan funsionáriu públiku no hatene kuandu lori sasan ka propriedade estadu nian hodi ba hala'ó fali kampaña ka atividade seluk lei la permite. Tanba ne'e husu ba tribunál atu kondena arguidu tuir artigu 296 Kódigu Penál.

Iha parte seluk, defeza husu ba tribunál atu aplika pena ne'ebé kmaan ba arguidu ho konsiderasaun sira katak, iha arguidu konfesa, arrepende ona nia hahalok, iha oan nain tolu, no foin primeira-vés mai hatan iha tribunál.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba prova sira ne'e hotu, tribunál konklui prosesu ne'e kondena arguidu ho pena prizaun fulan 3 no suspende ba tinan 1 no selu kustu judisiál US\$30.00.

23. Krime ofensa ba integridade física simples ho natureza violência doméstica

Nú. Prosesu : 0094/18.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 6

Iha 16 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JRNA hasoru nia aman, iha Distritu Oekusi.

Akuzasaun Prokuradór

Prokuradór akuza katak iha 29 Maiu 2018, maizumenus tuku 09.30 dader, arguidu tuku dala ida iha lezadu nia kabaas no tebe dala ida iha lezadu nia reen-toos no rezulta lezadu sofre bubu, mean no moras iha lezadu nia kabaas no reen-toos. Aktu ne'e akontese wainhira lezadu hatete ba arguidu katak lezadu katuas ona laiha forsa atu kaer servisu todan, husu ba arguidu tenke buka servisu atu sustenta arguidu nia feen ho nia oan. Kazu ne'e aneksa mós ho relatóriu médiku husi Ospital Referral Oekusi no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade física simples ho moldura penál to'ó tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha prosesu julgamentu, arguidu konfesa faktus hotu iha akuzasaun, arguidu deklara katak arrepende ona nia hahalok no foin primeiravés mai hatan iha tribunál. Liután arguidu deklara katak diak malu ona ho lezadu. Iha parte seluk lezadu konfirma faktus hotu iha akuzasaun no deklara mós katak diak malu ona ho arguidu.

Enkuantu testemuña NA nu'udar arguidu nia alin depoimenta katak iha akontesimentu ne'e arguidu arguidu tuku dala ida iha lezadu nia kabaas no tebe dala ida iha lezadu nia reen-toos.

Alegasaun final

Prokurador konsidera arguidu provadu komete krime hasoru lezadu bazeia ba konfisaun arguidu nian. Prokurador haktuir tan katak tuir loloos arguidu tenke agradese ba lezadu, tanba wainhira arguidu ba Dili soe hela feen-oan no lezadu mak tau matan. Tanba ne'e husu ba tribunál atu kondena arguidu tuir artigu 145 KP.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu konfesa, arrepende ona nia hahalok, foin primeiravés mai hatan iha tribunál no diak malu ona ho lezadu.

Desizaun

Depoide avalia faktu sira hotu, tribunál prova katak arguidu komete duni krime tuir faktus sira iha akuzasaun prokurador nian. Bazeia ba faktu provadu sira ne'e, tribunál kondena arguidu ho pena prizaun fulan 6.

24. Krime ofensa ba integridade física simples

Nú. Prosesu : 0027/18.OEPMK
Kompozisaun Tribunál : Singulár
Juis : Dr. João Ribeiro
Prokurador : Dr. Mateus Nesi
Defeza : Dr. Calisto Tout
Tipu pena : Pena admoestasaun

Iha 23 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ne'ebé envolve arguida Silvia Maria de Fatima Soares hasoru lezada Judita Poto, iha Suku Costa, Sub-distritu Pante-makassar, Distritu Oekusi.

Akuzasaun Prokurador

Prokurador akuza katak iha 13 Juñu 2018, maizumenus tuku 19.00 kalan, arguida basa dala ida iha lezada nia matan fukun parte loos no rakut lezada nia fuuk. Aktu ne'e akontese, tanba kanu bee nian lezada losu tiha. Kazu ne'e anexa mós ho relatóriu médiku husi Ospital Referral Oekusi no fotografia husi Polisia-VPU.

Prokurador akuza arguida kontra artigu 145 Kódigu Penál kona-ba ofensa ba integridade física simples ho moldura penál to'o tinan 3 ka multa.

Produsaun ba prova sira

Iha julgamentu, arguida konfesa faktus hotu iha akuzasaun no deklara katak iha kaontesimentu ne'e arguida ba fó hatene lezada nia laen atu monta fali kanu bee nian ne'ebé lezada losu sai tiha. Nune'e lezada kaer basia ne'ebé be nakonu hela tidin tun ba rai hodi bee fakar no kona arguida, tanba ne'e arguida halo agresaun hasoru lezadu. Arguida reforsa tan katak seidauk diak malu ho lezada tanba lezada hakarak dame maibé ho kondisaun katak arguidu tenke fó indemnizasaun

sivil US\$1000.00 maibé arguida hakarak fó deit tais fetu ida no osan US\$50.00. Iha parte seluk lezada konfirma faktu hotu iha akuzasaun.

Testemuña Agostinho Tasae nu'udar lezada nia laen depoimenta katak loos duni antes ne'e, arguida ba fó hatene testemuña katak lor-loron lezada estraga hela bee no husu ba testemuña atu monta ka hadia torneira ne'e atu nune'e bee sai labele estraga, no bee bele halai to'o mós arguida sira nian. Testemuña haktuir tan katak iha momentu akontese ne'e, arguida halo agresaun fízika hasoru lezada no testemuña laharee ka laron a antes akontesimentu ne'e lezada tolok uluk arguida.

Testemuña Antonio Bobo nu'udar viziñu depoimenta katak lahare lezada no arguida istória malu to'o baku malu, tanba momentu akontese testemuña iha kuartu laran habosok nia oan toba. Depoisde testemuña nia oan toba testemuña lori fila ba arguida ba nia uma.

Testemuña Juliana Colo nu'udar viziñu depoimenta katak kuandu arguida ba fó hatene lezada nia laen atu monta fali kanu bee ne'e mak lezada kaer basia 1 ho bee tidin tun ba rai hodi bee fakar kona hotu arguida. Hafoin arguida basa lezada no rakut lezada nia fuuk. Iha loron akontesimentu ne'e bee sai, maibé tanba lezada losu tiha kanu bee ne'e no bee labele liu ba arguida sira inklui testemuña rasik.

Alegasaun final

Prokuradór konsidera arguida provadu komete krime hasoru lezada bazeia ba konfisaun arguida nian mesmu ida-idak defende ninia razaun. Prokuradór hatutan liután katak, tuir loloos arguida fó hatene direktamente ba estadu liuhosi diresaun Saniamentu Aqua no Sanitaria (SAS) mak tenke tun hodi haree kanu ne'ebé lezada losu ka estraga ne'e. Tanba ne'e husu ba Tribunál atu kondena arguida tuir artigu 145 KP.

Defeza husu ba tribunál atu aplika pena ne'ebé adekuaudu ho konsiderasaun sira katak iha produsaun ba prova arguida rasik iha kolaborasaun diak ho tribunál no konfesa faktu hotu iha akuzasaun, arrepende ona nia hahalok, iha oan nain tolu no arguida tenta atu dame-malu ho kondisaun fó tais fetu 1 no osan US\$50.00 maibe lezada rasik mak lakohi dame. Mesmu iha produsaun ba prova parte sira ida-idak buka testamuña atu defende arguida ka lezada sira ninia razaun.

Desizaun

Depoisde avalia faktu sira hotu, tribunál prova katak arguida komete duni krime hasoru lezada. Bazeia ba faktu provadu sira ne'e tribunál konklui prosesu ne'e no kondena arguida ho pena admoestasaun.

25. Krime ofensa korporál resíproka

Nú. Prosesu	: 0076/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Omologa pedidu dezistensia keixa

Iha 26 Novembru 2018, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve arguida Sezaltina de Fatima da Costa, arguidu Jaime Taco hasoru lezadu João Oematan, iha Suku Costa Sub-distritu Pante-makassar, Distritu Oekusi.

Akuzasaun Prokuradór

Prokuradór akuza katak iha 06 Maiu 2018, maizumenus iha tuku 23.30 kalan, arguida lori fatuk tuda dala ida no kona iha lezadu Jaime nia kotuk laran no kauza lezadu sofre moras. Enkuantu arguidu Jaime basa dala ida iha lezadu João nia hasan parte loos no rezulta lezadu sofre moras no monu ba rai, hafoin arguidu Jaime kontinua tuku dala ida iha lezadu nia ibun no rezulta lezadu sofre moras. Aktu ne'e akontese sein motivu ne'ebé klaru. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguidu/a nkontra artigu 151 Kódigu Penál kona-ba krime ofensa korporál resíproka ne'ebé ho moldura penál too tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu/a sira.

Iha prosesu konsiliaun ne'e, arguidu/a sira hakarak dame malu de'it sein kondisaun no dada fali sira nia-keixa no deklarata katak arrepente ona ba sira nia hahalok no promete katak sei la repete tan hahalok hanesan iha futuru.

Alegasaun final

Prokuradór no defeza apresia akordu dame ne'ebé parte sira decide ona no husu ba tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi parte sira, tribunál konklui prosesu ne'e no omologa akordu dame entre parte sira.

26. Krime ofensa ba integridade física simples ho natureza violência doméstica

Nú. Prosesu	: 0093/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Calisto Tout
Tipu pena	: Pena prizaun tinan 1 suspende ba tinan 1

Iha 27 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu AN hasoru nia feen, Distritu Oekusi.

Akuzasaun Prokuradór

Prokuradór akuza katak iha 25 Maiu 2018, maizumenus tuku 08.00 dader, arguidu ho lezada diskute malu kona-ba lezada deskonfia arguidu iha relasaun (amante) ho feto seluk nune'e arguidu tuku dala haat iha lezada nia kotuk laran no dala ida iha lezada nia kanuruk no rezulta lezada sofre moras. Kazu ne'e aneksa mós ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktus hotu iha akuzasaun, arguidu deklara katak arrepende ona nia hahalok. Arguidu deklara katak servisu hanesan OJEK ho rendimentu kada fulan US\$50.00. Arguidu haktuir tan katak foin primeira-vés mai hatan iha tribunál no diak malu ona ho lezada.

Prokuradór husu ba Tribunál atu prezinde lezada nia deklarasaun, tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian. Prokuradór hatutan liután katak, tuir lolos arguidu mak proteze lezada no bele uza maneira ida ne'ebé laho violénsia atu rezolve problema ne'e. Maibé pelu-kontrariu arguidu halo fali krime hasoru lezada, nune'e husu ba Tribunál atu kondena arguidu tuir artigu 145 KP.

Defeza husu ba tribunál atu kondena arguidu ho pena ne'ebé kmaan ho konsiderasaun sira katak arguidu konfesa, arrepende ona nia hahalok no foin primeiravé mai hatan iha tribunál no diak malu ona ho lezada.

Desizaun

Depoide avalia faktu sira hotu, tribunál prova katak arguidu komete duni krime tuir faktus sira iha akuzasaun prokuradór nian. Bazeia ba faktu provadu sira ne'e, tribunál kondena arguidu ho pena prizaun tinan 1 no suspende ba tinan 1.

27. Krime ofensa ba integridade fízika simples

Nú. Prosesu	: 0133/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Absolve

Iha 27 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ne'ebé envolve arguida Brigilia Haumetan hasoru nia viziñu Helena Abi da Costa, iha Suku Costa, Sub-distrito Pante-makassar Distritu Oekusi.

Akuzasaun Prokuradór

Prokuradór akuza katak iha 27 Jullu 2018, maizumenus iha tuku 17.00 lokraik, arguida tuku dala ida iha lezada nia kotuk laran no kauza lezada sofre moras. Arguida kontinua kaer metin lezada nia liman rua no arguida nia liman kukun kona iha lezada nia kabun no rezulta lezada nia kabun kanek kois, ran no bubu. Aktu ne'e akontese sein motivu ne'ebé klaru. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguida kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Iha julgamentu, arguida konfesa parsialmente ba faktus iha akuzasaun katak iha akontesimentu ne'e lezada no arguida diskute malu deit, arguida la tuku no lakaer metin lezada nia liman rua.

Iha parte seluk lezada konfirma faktus hotu iha akuzasaun no deklarata katak arguida tuku dala ida iha lezada nia kotuk laran no tuku dala ida iha lezada nia kanuruk no kauza lezada sofre moras no arguida nia liman kukun kona iha lezada nia kabaas parte loos rezulta kanek, ran sai, bubu no moras. Lezada deklarata katak depoisde akontesimentu ne'e liu loron 5, lezada nia kabaas sei bubu no moras.

Alegasaun finál

Prokuradór konsidera arguida provadu komete krime hasoru lezada tuir faktus sira hotu iha akuzasaun mesmu iha produsaun ba prova arguida rasik nega katak nia latuku no lakaer lezada nia liman rua. Maibé iha parte seluk, lezada konfirma faktus hotu iha akuzasaun. Tanba ne'e husu ba tribunál atu kondena arguida tuir artigu 145 KP.

Enkuantu defeza haktuir katak arguida deklarata deit faktus ne'ebé arguida komete katak sira diskute malu deit no arguida foin primeiravés mai hatan iha tribunál. Tanba ne'e husu ba tribunál atu absolve arguida hosi prosesu ne'e.

Desizaun

Depoisde avalia faktus hotu, tribunál konsidera arguidu la provadu komete krime tuir faktus sira iha akuzasaun, tanba lezada nia deklarasaun ho relatóriu médiku lahan malu. Bazeia ba prova sira ne'e hotu, tribunál absolve arguida prosesu ne'e.

28. Krime ofensa ba integridade fízika simples ho natureza violénsia doméstika

Nú. Prosesu	: 0104/18.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nessi
Defeza	: Dr. Marcelino Marques Coro
Tipu pena	: Pena admoestasaun

Iha 27 Novembru 2018, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida HP hasoru nia laen, iha Distritu Oekusi.

Akuzasaun Prokuradór

Prokuradór akuza katak iha 13 Juñu 2018, maizumenus tuku 13.00 lokraik, arguida rega aimanas been ba lezadu nia matan no rezulta lezadu sofre moras no lezadu nia matan labele haree. Aktu ne'e akontese wainhira arguida husu lezadu katak *bainhira ó lori ha'u ba entrega iha ha'u nia familia*. Arguida halo agresaun ne'e tanba arguida ho lezadu fahe-malu tinan ida ona no lahela hamutuk hanesan feen-laen iha uma ida, maibé familia sira seidauk tuur hamutuk atu ko'alia sira nia problema ne'e. Mezmu nune'e lezadu sempre apoiu oan sira kada fulan no prosesu divorsiu sei hein desizaun tribunál. Kazu ne'e aneksa mós ho relatóriu médiku husi Ospital Referral Oekusi no fotografia husi Polisia-VPU.

Prokuradór akuza arguida kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3, 35 letra (b) no artigu 36 LKVD.

Produsaun ba prova sira

Iha julgamentu, arguida konfesa integralmente ba faktus hotu iha akuzasaun. Arguidu deklara katak arrepende ona nia hahalok maibé sente laran moras kuandu lezadu husik hela arguida ho nia oan nain lima. Arguida servisu nu'udar to'ós-na'in no laiha rendimentu fixu kada fulan no foin primeiravés mai hatan iha tribunál no seidauk dame malu ho lezadu tanba durante ne'e hela keta-ketak. Arguida haktuir tan katak depoisde akontesimentu ne'e lezadu lahalo tuir nia obrigasaun alimentar ba nia oan nain lima no labarik sira hela hotu ho arguida.

Iha parte seluk lezadu konfirma faktu hotu iha akuzasaun, lezadu deklara katak durante ne'e lezadu sempre apoiu nesesidade oan sira nian inklui selu oan sira nia eskola sein kuñesementu husi arguida. Lezadu haktuir tan katak lezadu sempre fó osan ba sira nia oan mane bo'ot hodi selu nia nesesidade eskola nian.

Testemuña JA nu'udar sira nia oan mane bo'ot depoimenta katak depoisde lezadu sai husi uma nunka fó osan ba sira.

Alegasaun final

Prokuradór konsidera arguida provadu komete krime hasoru lezadu bazeia ba konfisaun arguida nian mesmu ida-idak defende ninia razaun. Tanba ne'e, atu prevene no evita krime hanesan akontese tan iha futuro, husu ba Tribunál atu kondena arguida tuir artigu 145 KP.

Defeza husu ba tribunál atu aplika pena ne'ebé adekuaudu ba arguida ho konsiderasaun sira katak arguida konfesa no arrepende ona nia hahalok, iha oan nain lima no laiha rendimentu fixu kada fulan.

Desizaun

Depoisde avalia faktu sira hotu, tribunál prova katak arguida komete duni krime hasoru lezadu bazeia ba faktu provadu sira ne'e, tribunál konklui prosesu ne'e no kondena arguida ho pena admoestasaun.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl